

# LESSON 3

\*January 13 – 19

## Topa in Maang Tawntung Hi



### SABBATH NITAAK

**Tu Kaalsung Simding:** Late 8; 100; 97; 75; 105:7–10; Gal. 3:26–29; Late 25:10.

**Kamngah:** “Topa in in uk a, vangliatna kumpi puan kisilhsak hi. Topa, kumpi puan kisilhsak a, thahatna tawh amah kidim hi. Leitung kikipsak a, kiling ngeilo ding hi.” (Late 93:1)

**L**ate in Pasian ukna sungah uplahna, muanlahna a nei lote khengak in taal lo ding ahihna hong hilh hi. Topa om na khempeuh bawlin Ama vangliatna in a bawl bangin a om suak uh hi. Amah in na khempeuh tungah ukna nei-in Amah in thuman le dikna tawh leitung a uk hi. Ama thukhamte le thukhunte in hoihna tawh kidimin Ama thukham a nuntakpih mite in nunna a ngah thei uh hi. Topa in a man thukhen pa hi; leitung in Ama sawl bangbangin a om hi. Ama thupiakte a nial zo ding kuamah a om kei hi.

Amah in midikte tungah thaman a pia hi. Gitlohma tawh a nungta mite in zong thaman a ngah uh hi. Pasian in a mi Israelte tawh thuciam a bawl hi. Hih thuciam in Topa hotkhiatna thu a pulaak hi. Topa in Israel minamte Ama luah dingin a pom hi; amaute in Ama neihsa hi. Namdangte lak panin Ama mi dingin Israel minamte a bawl hi. Topa in a mite tungah a ciampel ngei kei hi. A mite in thuman lo-in Amah nungat khin uh hi mah taleh Topa in amaute a taisan kei hi. Topa in Ama ukna tawh leitung a uk hi. Na khempeuh in Ama koih bangin a om uh hi. Tua hi-in Topa in thutanna tawh leitung a uk hi. Late gelhte in hih thute in Lai Siangtho thu guipi ahihna i theihtel ding lamen uh hi. Hih thu in khuamial laka lamlak meivak bang hi. Late gelhte in lungsim khempeuh tawh Topa i zuih ding hong deih uh hi.

\*January 20, Sabbath a ding kiginkholhna in tu kaal lesson sim in.

## Topa in Eite Hong Piangsak Hi

**Simin, Late 8 le Late 100. Koi bangin Pasian le a mite thu kipulaak hiam? Hih Late in Pasian zia le tong bang pulaak uh hiam?**

---

Piansakna thu in Late in a pulaak thute lakah thu bulpi khatin pulaak hi. Piansakna in Pasian vangliatna a pulaak hi. Vantungte in “Topa khutma ahi hi. Hihte in Ama vangliatna le A minthanna a pulaak uh hi. (*Late 19:1–4; 97:6*). Pasian min thanna in leitung mun khempeuh ah kizel hi (*Late 8:1, 16*). Topa in na khempeuh a piangsak hi; Amah in kipatna neilo-in, (*Late 93:2*) beihun zong neilo hi (*Late 102:25–27*). Amah in a tawntungin a om Pa hi-in, na khempeuh tungah ukna nei hi. Amah in minam khempeuh le pasiante tungah ukna a nei hi. “Amah in mihingte sepna khempeuh tungah ukna nei hi (*Late 115:4*); “Mihingte bawltawm pasian tuamtuan te in kimanna neilo hi (*Late 115:7*); Topa khut sungah ahihleh na khempeuh a om hi. “Ama khut in leitung a bawl hi. (*Late 95:4, 5*).

‘Late’ in piansaknate tungah Pasian vangliatna a pulaak hi (*Late 29, 93, 104*). Late in Topa in piansak nate tungah ukna nei ahihna honghilh hi. Ama vangliatna tehpiah ding bangmah omlo hi. *Late 100:3* in angsung khualna, duhhop huaihamna in milim biakna mah hi, cih honghilh hi. Hih sungah ei le ei kimuanna zong kihel hi. Tua hi-in Pasian bek mah muangin Ama tungah kinga ding kisam hi.” Piansakna thu in hih thu pulaak hi. Pasian hang bekin na khempeuh a omthei ahi hi. Amah in nuntakna khempeuh a kem hi.

*Late 95:7; 147:4–9* sim in. Pasian in a mi Israelte nungtasak bek tham lo-in a mi dingin la-in lono-na munah “Tuu” bangin a paipih hi (*Late 100:3*). “Ama mite” cihleh “Ama tuute” cih in Pasian in a mite tawh akip kizopna nei ahihna kimu thei hi. Late sungah “Nuntakna huu nei khempeuh in Topa phat hen” ci-in sawlina thu mun tampi-ah kimu thei hi; huihlak vasate, tui sung ganhing tuamtuan le na khempeuh in Pasian phat dingin hongsawl hi. Topa mai-ah lungdam kipak dingin hong sawlina thu zong kimu thei hi. Pasian vangliatna in a bawlsa nate tungtawnin kimu kilang hi. Mawhna tawh kidim himah taleh piansak na khempeuh in Piangsak Pa vangliatna pulaak hi, ci-in Late in honghilh phapha hi. Amah bekmah biaktakcing ahihna honghilh hi.

**“Na phawk tham dingin mihing tate in bang hi lel ahi hiam? (*Late 8:4*). Piangsak Pa Pasian tawh na kizopna in koi bang hiam? Bang hunin Pasian in aksite min vawh hiam? (*Late 147:4*). Pasian in bangzahtakin hong awlmawh ahi hiam?**

## Topa in Maang Hi

Topa in Piangsakpa hi cihleh Ukpa hi, cihthu in a kikhentuam thei thu hilo hi. "Topa in Ama vangliatna *Late 93:1,7* in zong a pulaak hi (*Late 96:10; 97:1; 99:1*) in Late Bu in a pulaak thute ahihna kimu thei hi. Topa in pahtawi-na, vangliatna le hatna khempeuh tawh kidim hi (*Late. 93:1, 104:1*). Ama kimkot in khuamial le meipi tawh kidim hi (*Late 97:2*), ahi zongin Amah in puansilh bangin khuavak a silh hi (*Late 104:2*). Hihte in limciinna nei vive hi-in Kumpipa vangliatna le picinna a pulaak limciin nate hi. Ama mite tungah Ama vangliatna hong kilangkhia-sak hi. Pasian vangliatna minphatna kuamah in a pulaak khin zo kei ding hi.

**Simin, Late 97. Topa ukna bang kipulaak hiam? (*Late 97:2, 10*). Bang tungah Topa in uk hiam? (*Late 97:1,5, 9*).**

---

Topa ukna in a bawlsa na khempeuh tungah kimu thei hi (*Late 96:5*). Hokhiatna tungah ukna nei hi (*Late 98:2*). Thukhenna tungah ukna nei hi (*Late 96:10*). Leitung buppi tungah ukna kip a nei Topa hi (*Late 47:6–9*). Topa ukna in a tawntung a kip ding hi; Ama vangliatna le minthanna kuamah in a dem zo kei ding hi (*Late 45:6; 93:1, 2; 103:19*). Topa ukna in hehpihna, thutanna le dikna tungah kinga hi. Tua in piensak na khempeuh kituak takin hong omsak hi (*Late 98:3, 99:4*). Pasian vangliatna in vantung le leitung a biakpiakna a piate khempeuh pumkhat a suaksak hi (*Late 103:20–22; 148*). Late Bu sungah mihing in Pasian ukna nuai-ah om ahihna thu pulaak hi (*Late 96:10; 97:1; 99:1; 145:11–13*).

Ahi zongin mi khempeuh leitung ukna neite a kipan ukna nei khempeuh in Topa ukna nuai-ah a om hi. Mi gilote in Topa ukna a langpan tawntung uh hi. Topa mite zong a nengniam uh hi (*Late 14:1; 74:3–22*). Pasian a langpang mite in nopsakna le cihtheihna tawh nungta-in, Pasian a muang mite in ahihleh genthei cimawhin om phial hangin Late bu in Topa sungah muanna kip nei tawntung ding hong hilh phapha hi. Pasian in a manin thu hong khen ding hi, ci-in muanna tawh i kalsuan ding kisam hi (*Late 68:21; 73:17–20*). Pasian mite in upna tawh Pasian ukna kipan hi, cih thu Khrih hong hotkhiatna tawh kipanin Nihvei Kumkikna hun hong tun ciangin vangliatna tawh leitung kidim ding hi (*Matt. 12:26–28, 1 Kor. 15:20–28*). "Topa na it ding a, siatna na mudah ding hi" (*Late 97:10*).

**Bang hangin Topa it in siatna mudah ding kisam hiam? Koi bangin hih thu nih in kizopna nei hiam?**

**Topa in Thukhenpa hi**

**Simin**, Late 75. Bang hangin migilote kiphatsakna in a mawka hiam?

---

Ukna nei Kumpi ahih bang mahin Topa in Thukham hongpia Pa hi (*Late 99:7*); Thukhenpa zong hi (*Late 98:9, 97:2*). Mi gilote in Pasian thukham langpan tawntung uh hi. Ahizongin Topa in leitung thukhen a siatna bei-na hong tung ding hi (*Late 75:8–10, 96:13*). *Late 75* in zong mi gilote le leitung kisiat ding thu pulaak hi. Tua bangin kisiatna a pulaakna-ah limciinna tuamtuam tawh honghilh a, lenggah tui dimin a om hai in Pasian hehna a pulaak kammal hi (*Late 75:8*). Pasian hehna a kihtak huai-na thu zong honghilh hi (*Jer. 25:15,20; Mang. 14:10*). Midikte in pahtawi-na a ngah ding hun Pasian in sehnasa khat nei-a, tua hun hong tun ciangin (*Late 75:2*) ahihkeileh Topa' thukhen atun ciangin midikte in minthanna le pahtawi-na ngah ding uh hi. Hih thukhenna in leitung hunbei ciangin kitel takin hong tung ding thu ahi hi (*Late 96:13,5; 1 Kor. 15:23–26*). Topa in a mite lungsim a sittel hi.

*Late 14:2* sim in. Hihin *Pian. 6:5, 8* hong phawksak hilo hiam? *Late 14* le *Pian. 6* sung a thute in Pasian in a mite a hotkhatma-in leitung mi khempeuh tungah thukhen ahihna kimu thei hi. Hih thukhenna pen “Dawpkholh thukhenna” “Sittel thukhenna” kici hi. Pasian in midikte lamah pangin mi gilote tuah ding thu a khen hi.

**Amasa-in** Pasian in siatna panin a mite honkhia hi (*Late 97:10, 146:9*); hotkhatna lukhu amaute tungah khusak hi (*Late 149:4*). **Nihna-ah** mawhna kisiklo mi gilote in tawntung kisiatna thuak uh hi (*Late 97:3*). Mihing gitlohma in Pasian thukhenna langpan tawntung den hi (*Late 76:3–6*). Topa in migilote mawhna maisak himah taleh, amaute in siatna sungah nuntakna nuamsa zaw uh a, Topa a langpan tawntung den uh hi (*Late 99:8*). Pasian mite bekthamlo-in midikte in zong Pasian mai-ah thukhenna thuak ding uh hi (*Late 50:4,1; 135:14*).

*Late mun tampi* in zong migilote le midikte in Pasian thukhenna thuak ahihna a pulaakna kimuthei hi. Tua thukhenna-ah Pasian mite tungah thukhenna kipan masa hi (*Thkna. 32:36,5; 1 Pet. 4:17*). *Late gelhpa* in Topa tungah kiko hi; Topa dikna siksanin ama tungah thukhen dingin a ngen hi; ama lamah pangin a galte mawhsakna thute hemkhia dingin a thuum hi (*Late 7:8–11; 139:23, 24*). *Late* in Topa thukhenna hangin lungdam ding zong honghilh hi (*Late 67:4; 96:10–13; 98:4–9*).

**Bangci bangin Pasian thukhenna in Khrih sisan tawh sianthona a ngahte adingin lungdam huai thu suak thei hiam?**

## Ama' Thuciamna Phawk Tawntung

**Simin**, Late 94:14; 105:7–10; Dan. 7:22. Pasian thukhenna thu bulpi in a thupi hih dotna hong suaksak hi. Bangci bangin Pasian mite in Pasian tawh kilemna ngah thei uh hiam? Koi bangin amaute in Pasian thukhenna-ah khamuang takin om thei uh hiam?

Pasian mite in bitna sungah a nungta thei uh hi. Banghang hiam cihleh Topa Pasian in Ama omna Zion ah amaute a koih hi (*Late 76:1, 2*); tua banah Amah in amaute tawh tawntung thuciamna a bawl hi. Amaute in Ama gamh le go ahi uh hi (*Late 94:14; 105:8–10*). Pasian in amaute kamciam a pia mawk hilo-in; amaute niallo hi; Ama sungah amaute in bitna tawh a nungta dingin hong bawl hi. Amah in amaute mawhna khempeuh a maisak hi (*Late 103:3*); Amah in amaute thu hilhin, lamlak hi; amaute tha a guan hi (*Late 25:8–11; 29:11; 105:24*). Pasian thukhenna in mihingte thuman thutakah a hong tunpih hi. Ama thukhenna in eite hong kem hi, cih a honghilh hi (*Late 94:8–15*). *Late 105* in A mite tungah Topa cihtakna a pulaak hi. Amah in Egypt gamah Joseph a tonpih hi. Joseph tungtawnin Israelte le namdang khempeuh in gil sung panin suahtakna a ngah thei uh hi (*Late 105:16–24*). Topa in Egypt gam a saltang A mite honkhia hi; A mite aitangin Amah in na lamdang tuamtuamte piangsak hi (*Late 105:25–38*). Topa in A mite tungah Kamciam Leitang luah dingin a pia hi (*Late 105:11, 44*) tatsat lo-in Amah in amaute a kem tawntung hi (*Late 105:12–15*). Amah in amaute ci'pha-in a pungsak hi (*Late 105:24*), saltanna panin amaute a suakta sak hi (*Late 105:37, 38*), amaute nisim kitangsapnate a pia hi (*Late 105:39–41*).

Topa in a mite tawh a thuciam bangin gamtatna hizaw hi (*Pian. 8:1; 1 Sam. 1:19; Late 98:3; 105:42–44*). Tua bang mahin a mite in Pasian sepnate le a thukhenna a phawk uh ciangin, amaute in Pasian zahtakna, Ama deihna bangin nungta khuasa uh hi. Hih thuciamna sungah Israelte in tua thuciamna-ah a cihtak ding uh sapna bulpi hi zaw hi (*Late 78:5–7; 105:45*). Pasian mite in namdang lakah khuavak a tangsak ding, Ama tec ihi dingin sapna ngah ahi uh hi. Bang hang hiam cihleh Topa in namdangte zong a mi Israelte lakah hong kihel dingin deih hi (*Late 105:1, 7*). Tua hi-in leitung mi khempeuh in hih thuciamna sungah bitna a ngah thei ding uh hi. Vangliatna le hehpilna tawh a kidim Topa Pasian in amaute hong kem hong cing hi (*Late 89:28–34*).

**Zeisu sungah bang nei i hiam? Bang hangin tua thute in nidang Israelte tungah kipia hi mah taleh tuhun eite adingin zong hong kipia ahihna bangci bangin theithe ding i hiam?** *Gal. 3:26–29*

## Teci pan nate-in Thuman Thutak Hi

**Simin, Late 19:7; 93:5; 119:165; 1:2, 5, 6; 18:30; le 25:10.** Hihte in bang thu pulaak ciat uh hiam?

Topa in vankhuanuai khempeuh tungah ukna nei hi. Amah in Piangsak Pa, Kumpi, Thukhen Mangpa hi. Tua hi-in Ama pulaak thute in thumanin khial lo hi (Hebrew tawh kigelhna-ah ‘*edut*,’ ‘*thupiak*,’ ‘*thukham*’) cih thu in Thukham khempeuh le a thupiak khempeuh huam hi. Topa in a mite biakpiak na, nuntak khuasakna khempeuh tungah ukna a nei hi (*Pai. 32:15*). Ama thupiak khempeuh in “thuman thutak hi; muan taakcing hi” (*Late 93:5*) Pasian ukna tokhom in kip tawntung hi. Leitung in Pasian piansak ahinhna le Ama kepna hangin na khempeuh a om thei ahinhna kimu thei hi (*Late 93:1, 2*). Hebrew kammal-ah “muantak cing hi” cih kammal in “Kingak thamcinc” “cihtakna” “Kipna” pulaak hi (*2 Sam. 7:16, 1 Khang. 17:23*). Pasian thukham in kikhel ngeilo, kisia thei ngeilo; beihi cih bang omlo hi.

Pasian in a thuciamte le a kamciamte, a thupiakte tungah cihtakna nei hi; tua bangin a cihtakna in a kikhel ngeilo Ama zia le tong honghilh hi. Mihing in Pasian muanna nei-a Ama thupiak bangin a nuntak ding ksam hi. Tua kawm mahin leitung ah thuman thutangin nuntak ding hongdeih hi. Thuman thutanna pen na khempeuhte kingakna hi (*Late 18:7, Isa. 24:18–21*). Pasian thukham in midikte kalsuan nading lampi honghilh hi. Tuahi-in midik in kiling ngeilo hi. Banghang hiam cihleh midikte in Pasian thukham tungah kiptakin nungta uh hi. Amaute ngaihsutnate in Topa sungah kiptakin a om hi [Hebrew tawh kigelhna-ah “*Kun*” a khiatna in Topa sungah “*Linglo*” “*bitna*” cihna hi (*Late 112:1, 6, 7*)]. Amaute in Pasian thukham nuntakpih ding pan in bangmahin a dal zo kei hi (*Late 119:165*), Pasian thukham in kisiat nading panin amauta a dal hi; amauta nuntak khuasak ziading ahilh hi (*Late 1:2,3,6*).

Pasian Kammal in meivak bangin, Pasian mite pai nading lampi a lak hi, ci-in Late in pulaak hi. Tua khuavak in thupi mahmah a, galte lampi panin hongkeem hi. Tua khuavak in a kicelsip galte thaangsiah nate khempeuh a kilangsak hi (*Late 119:105, 110*). Pasian thukham a itte in lungnopna a ngah thei uh hi (*Late 119:165*); tua nopna sungah a nuntak uh hangin gimna, buainate tawh kipelh thei uh hituanlo hi (*Late 119:161*). Pasian thukham in Pasian ompihna sungah hong tonpih a, nuntakna khempeuh in Topa tawh kizopna neisak hi.

**Bangci bangin Pasian thukham na nuntak pih hiam? Thukhunte le teci pannate in Pasian thukham na nuntak pih thei dingin hong huh hilo hiam? A langkhatah Pasian thukhamte palsatna hangin bang gimnate kituak kha thei hiam?**

**Ngaihsutbeh Ding:** Late 86:5, 15; Ellen G. White, “*God’s Love for Man*,” *Steps to Christ*; pp. 9–15 simin. Koi bangin thuman thutak in Pasian itna hong neisak thei hiam? Ama thu theihna sangin Amah mah itna hong neisak hiam?

Tu kaalsung i sin thute in Pasian nasepna le Pasian hong kilakzia tuamtuam thute i pulaak khin hi. Na khempeuh in Pasian piantsak ahihna le Ama sungah na khempeuh bit takin om ahihna thu zong i pulaak hi. Late gelhpa in Piangsak Pasian, Kumpi le Thukhen Mang, Kamciam tungtawnin Honpa le Thukham Piapa ahihna hang hi, ci-in pulaak hi. Vankhuanuai-a Pasian nasepnate a pulaak min tuamtuamte le Pasian dinmun a pulaak thute zong kimu thei hi. Amah in Tuucing Pa hi (*Late 23:1, 80:1*), Hotkhiatna Suangpi (*Late 95:1*), le Pa (*Late 68:5, 89:26*) hi, ci-in kimu thei hi.

Leitung ah gimna, siatnate lakah bitna, khamuanna i ngah thei hi. Bang hang hiam cihleh Pasian in na khempeuh tungah ukna nei hi. Amah in a belhtakcing Pasian hi. Late bu sung thusinna-ah Pasian zia le tong- itna, hehpihna, Ama hong hotkhiatna le leitung a bawl phat ding thute siksarin i sim ding kisam hi. “Singlamteh siksarin Pasian zia le tong theihna tam semsem hi leh hehpihna, dikna, thutanna le mawhmaisakna thu i mu semsem ding hi. Pasian hong itna in ciangtan nei lo-in hong kilang hi. Hih itna in nu in lampial a tate a itna tawh tehtheih ding zong hi lo hi.” Ellen G. White, *Steps to Christ*, p. 15. Late sungah mihing in Pasian a langpanna hangin Ama thukhenna thuak hi mah taleh, mihing in Topa mah beel tintenin Ama tungah kinga thei veve hi; bang hang hiam cihleh Topa hehna in tawm vei sung bek hi-in Ama hehinhna in a tawntungan a kip den hi (*Late 103:8*).

### Kikupding Dotnate:

- ① Bang hangin kido-na thu theihtelna in a tawpna-ah gimna, buai-na tampite lakah Pasian in na khempeuh tungah zawhna ngah ding hi, cih thu theihtelna hong guan hilo hiam? Bang hangin kido-na lianpi in hotkhiatna thu theihtelna hong guan thei hiam?
- ② Koi bangin Pasian in Piangsakpa hi, cih thu upna in piantsak nate tawh i kizopna hoih hong guan thei hiam? Hih thuman panin lam i pial khak ciangin bang thu piangin tuakkha i hiam? (*Late 106:35–42*).
- ③ Lai Siangtho hunlai-in milim biakpiakna tawh a kidim namdangte leitang in bang khialhna nei hiam? (*Late 115:4–8*). Tuhun milim biakna in bang thute hi ding hiam? Bang hangin milim biakna in Topa tawh i kizopna-ah lauhuai dinmun hong tunpih thei hiam?
- ④ Koi bangin Pasian mite in Ama thukhenna in Pasian mite tawh kipan hi, cih thu theitel thei ding hiam? Bangci bangin Pasian in a mite tungah thukhenin hih thukhenna hangin a gah bangte kimu thei hiam?